



REPUBLIKA E SHQIPËRISË
Kuvendi

P R O J E K T L I G J

Nr._____/2019

PËR

DISA NDRYSHIME DHE SHTESA NË LIGJIN NR.103/2016,
“PËR AKUAKULTURËN”¹

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.103/2016, “Për akuakulturën”, bëhen këto ndryshime dhe shtesa:

Neni 1

Në nenin 3 bëhen këto ndryshime dhe shtesa:

1. Në pikën 7, fjalia e parë ndryshohet, si më poshtë vijon:

“Zonë e përcaktuar për akuakulturë (ZPA)”, është një sistem planifikimi hapësinor apo zonimi, i kryer në nivel rajonal ose kombëtar;”.

2. Pas pikës 18 shtohet pika 19, me këtë përmbajtje:

“19. “Instalime në pronësi shtetërore”, tërësia e ndërtimeve që shërbejnë për kultivimin e organizmave ujorë, të tilla si vaskat, kanalet furnizuese dhe shkarkuese, inkubatorët, laboratorët, magazinat frigoriferike, si dhe

¹Ky ligj është i përafuar me rregulloren CE 1379/2013 të Parlamentit dhe Këshillit Evropian, të 11 dhjetorit 2013 mbi organizimin e përbashkët të tregjeve të produkteve të peshkimit dhe të akuakulturës, që amendon rregulloren (KE) 1184/2006 dhe rregulloren (KE) nr.1224/2009, të Këshillit dhe shfuqizon rregulloren (KE) nr.104/2000, të Këshillit.

çdo ndërtim tjetër që shërben për akuakulturë dhe që janë në pronësi ose në përgjegjësi menaxhimi të një enti shtetëror.”.

Neni 2

Pika 1, e nenit 5, ndryshohet, si më poshtë vijon:

“1. ZPA-ja përfshin zona të veçanta, të caktuara, përfshirë edhe instalimet në pronësi shtetërore, me qëllim aktivitetin e akuakulturës, së bashku me infrastrukturën në shërbim të saj.”.

Neni 3

Pas nenit 44 shtohen nenet 44/1 dhe 44/2, me këtë përmbajtje:

“Neni 44/1 Organizatat e prodhuesve

1. Organizatat e prodhuesve të sektorit të akuakulturës krijohen me nismën e prodhuesve të produkteve të akuakulturës dhe të njohura sipas procedurave të përcaktuara në ligjin nr.64/2012, “Për peshkimin”, të ndryshuar.
2. Në momentin e njohjes së organizatës së prodhuesve nga ministri, duhet të mbahen parasysh nevojat dhe gjendja specifike e prodhuesve të vegjël.
3. Një organizatë e prodhuesve që përfaqëson aktivitetet e akuakulturës mund të krijohet si organizatë e përbashkët e prodhuesve në sektorët e peshkimit dhe të akuakulturës.

Neni 44/2 Objektivat e organizatave të prodhuesve

1. Organizatat e prodhuesve në sektorin e akuakulturës ndjekin objektivat, si më poshtë vijon:
 - a) Nxisin realizimin e aktiviteteve të qëndrueshme të akuakulturës të anëtarëve të tyre, me anë të mundësive të zhvillimit të ofruara në përputhje të plotë me Strategjinë Kombëtare të Peshkimit dhe legjislacionit në fushën e mjedisit, duke respektuar politikën sociale;
 - b) Sigurojnë që aktivitetet e anëtarëve të tyre të jenë në përputhje me planet strategjike kombëtare;

- c) Synojnë të sigurojnë që ushqimet për akuakulturën me origjinë nga peshkimi, të vijnë nga peshkimi i menaxhuar në mënyrë të qëndrueshme.
2. Përveç objektivave të përcaktuar në pikën 1, të këtij neni, organizatat prodhuese ndjekin dy ose më shumë objektiva, si më poshtë vijon:
- a) Përmirësojnë kushtet për vendosjen në treg të produkteve të akuakulturës së anëtarëve të tyre;
 - b) Përmirësojnë performancën ekonomike;
 - c) Stabilizojnë tregjet;
 - ç) Kontribuojnë në furnizimin me ushqim dhe promovojnë standarde të larta të cilësisë dhe sigurisë ushqimore dhe, në të njëjtën kohë, promovojnë punësimin në zonat bregdetare e rurale;
 - d) Zvogëlojnë ndikimin mjedisor të akuakulturës.
3. Organizatat e prodhuesve mund të ndjekin objektiva plotësues të objektivave të mësipërm.”.

Neni 4

Pas pikës 3, të nenit 50, shtohen pikat 4 e 5, me këtë përmbajtje:

“4. Pezullimi i përcaktuar në pikën 3, të këtij neni, nuk zbatohet për instalimet, pronë ekzistuese shtetërore të akuakulturës.

5. Kontratat e lidhura përpara hyrjes në fuqi të këtij ligji, të cilave u mbaron afati përpara miratimit të ZPA-së, konsiderohen të vlefshme deri në miratimin e ZPA-së. Zgjatja e afatit të këtyre kontratave, deri në miratimin e ZPA-së, do të bëhet me kërkesë të ushtruesit të veprimtarisë së akuakulturës. Kërkesa për zgjatjen e afatit të kontratës refuzohet në rastet e parashikuara në shkronjat “a”, “b”, “ç” dhe “d”, të pikës 2, të nenit 25, të ligjit.”.

Neni 5 **Hyrja në fuqi**

Ky ligj hyn në fuqi 15 ditë pas botimit në “Fletoren zyrtare”.

K R Y E T A R I

GRAMOZ RUÇI